



**Jumat, 15 April 2022**  
**Ogen: Johanes 19: 28-30**



**IdungiNa dahinNa**



Jesus selaku anak Dibata, meteh kerna dahin si iampeken BapaNa man baNa. Dahin si labo mesunah mabasa, dahin si mberat tapi guna kiniulin kerina manusia ras isi doni enda. Dahin si iampeken Dibata man baNa e me bengket ku kayu persilang, ipakuken ras mate guna nebusi dosa manusia ras doni enda. Kayu persilang e encidahken keadilan Dibata, e me kerina dosa arus iukum. Dibata la nggit singgur ras dosa. Si erdosa asa ndigan pe la banci jumpa ras Dibata. Kerina manusia erdosa seakatan Jesus. E maka kerina manusia arus iukum mate, sabap upah dosa e me kematen. Mate rasa lalap, ertina sirang ras Dibata. Tapi i bas pusuh Dibata, lit keleng ate, la kal atena sirang ras anak-anakNa si enggo itepaNa. La kal ate Dibata manusia e mate rasa lalap erkiteken dosana, e maka idarami Tuhan dalam engkelengi manusia e alu cara anakNa si tonggal e ipakuken ku kayu persilang. Ia me jadi tebusen dosa manusia. La manusia ndai ipakuken ku kayu persilang, tapi Jesus. I bas kayu persilang e kerina dosa manusia ndai itungtungken man baNa. gelap gulita jadi tupung Jesus i datas kayu persilang e nuduhken bage lalana dosa doni enda, si erbahansa gelap lanai teralang. Dosa si melala e iampeken man Jesus. Nebusi dosa e, dareh ras kesah taruhenna. Kesah ras dareh e lambang kegeluhen. Kegeluhen Jesus iasamkenna lako nebusi dosanta. Nggit ia mate i datas kayu persilang guna kita. I datas kayu persilang e keadilan Dibata ras keleng atena ersada. I bas diri Jesus tangkas keadilan ras kekelengen Dibata e. Tangkas pe kepatuhen Jesus selaku anak manusia man bapaNa. Idungina dahinNa, la sada pe itoganNa kai si isuruh Bapa. KematenNa i kayu persilang e nuduhken dahinNa selaku anak manusia enggo dung. Sada pelajaran man banta e me perlu kal ndahiken dahin si isuruh Bapa seh asa dung.